

四庫全書

子部

欽定四庫全書

子部

廣弘明集卷二十八下

詳校官中書

臣沈鳳輝

檢討臣何思鈞覆勘

總校官檢對

臣何思鈞

校對官助教

臣張曾炳

謄錄監生

臣張新升

欽定四庫全書

廣弘明集卷二十八上

唐 釋道宣 撰

啟福篇第八

福號樂門日用斯貴  
準酌乘時行而不著

序

福者何邪所謂感樂受以安形取歡娛以悅性也然則  
法王立法周統識心三界牢獄三科檢定一罪二福三  
曰道也罪則三毒所結繫業屬於鬼王論其相狀後篇

備列福則四弘所成我固屬於天主道則虛通無滯據  
行不無明昧昧則乘分小大智涉信法明則特達理性  
高超有空斯道昌明如別斯顯今論福者悲敬為初悲  
則哀苦趣之艱辛思拔濟而出離敬則識佛法之難遇  
弘信仰而澄神緣境乃涉事情據理惟心為本故虛懷  
不繫則其福不回於自他倒想未移則作業有乖於事  
用故綿古歷今相從不息王者識形有之非我興住持  
於塔寺餘則因於不足多行施以周給是知為有造業

未曰超昇多由起過重增生死故云為有造罪一向須  
捨為有起福雖行不著由斯意致位行兩分滯則增生  
捨則增道道據逆流出凡入聖福則順生興倒結業故  
啟福本擬歷賢明

與朗法師書

北魏主拓跋珪

皇帝敬問太山朗和尚承妙聖靈要須經略已命元戎  
上人德同海嶽神筭遐長冀助威謀克寧荒服今遣使  
者送素二十端白氎五十領銀鉢二枚到願納受

與朗法師書

晉司馬昌期

皇帝敬問太山朗和尚承歡德光時飛聲東嶽靈海廣  
淹有生蒙潤大人起世善翼匡時輒伸經略懸稟妙算  
昔劉曜創荒戎狄繼業元皇龍飛遂息江表舊京淪沒  
神州傾蕩蒼生荼蓼寄在左衽每一念至嗟悼朕心長  
驅魏趙掃平燕代今龍旗方興克復伊洛思與和尚同  
養羣生至人通微想明朕意今遣使者送五色珠像一  
軀明光錦五十疋象牙簞五領金鉢五枚到願納受

答晉主昌明書

釋僧朗

僧朗頓首頓首夫至人無隱德生為聖非德非聖何敢  
有喻忝曰出家棲息塵表慕靜山林心怖玄寂靈寂難  
逮形累而已奉被詔命慰及應否大晉重基先承孝治  
惠同天地覆養無邊願開大乘申揚道味僧朗頓首頓  
首

與朗法師書

秦主苻堅

皇帝敬問太山朗和尚大聖膺期靈權超逸蔭蓋十方

化融無外若山海之養羣生等天地之育萬物養存生  
死澄神寂妙朕以虛薄生與聖會而隔萬機不獲輦駕  
今遣使人安車相請庶冀靈光迴蓋京邑今并送紫金  
數斤供鍍形像絹綾三十疋奴子三人可備灑掃至人  
無違幸望納受想必玄鑒見朕意

答秦主苻堅書

釋僧朗

僧朗頓首頓首如來永世道風潛淪忝在出家栖心山  
嶺精誠微薄未能弘近不悟陛下遠問山川詔命慙慙



實感恩旨氣力虛微未堪跋涉願廣開法輪顯保天祚  
蒙重惠賜即為施設福力之功無不蒙賴貧道才劣不  
勝所重僧朗頓首頓首

與朗法師書

燕主慕容垂

皇帝敬問太山朗和尚澄神靈緒慈陰百國凡在含生  
孰不蒙潤朕承藉纂統方夏是膺昔蜀不恭魏武含慨  
今二賊不平朕豈獲安又元戎剋興征掃暴亂至人通  
靈隨權指化願兵不血刃四海混伏委心歸誠久敬何

已今遣使者送官絹百疋袈裟三領綿五十斤幸為呪願

答燕主慕容垂書

釋僧朗

僧朗頓首頓首能仁御世英規遐邇光敷道化融濟四海貧道忝服道味習教山林豈惟詔旨詔及國難王者膺期統有六合大能并小自是常倫若葵藿之傾太陽飛步之宗麟鳳皇澤載融羣生繫仰陛下高明何思不服貧道窮林蒙賜過分僧朗頓首

與朗法師書

南燕主慕容德

皇帝敬問太山朗和尚遭家多難災禍屢臻昔在建熙  
王室西越賴武王中興神武御世大啟東夏拯拔區域  
遐邇蒙蘇天下幸甚天未忘災武王即晏永康之始西  
傾東蕩京華主上播越每思靈闕屏營飲淚朕以無德  
生在亂兵遺民未幾繼承天祿幸和尚大恩神祇蓋護  
使者送絹百疋并假東齊王奉高山荏二縣封給書不  
盡意稱朕心焉

答南燕主慕容德書

釋僧朗

僧朗頓首陛下龍飛統御百國天地融溢皇澤載賴善  
逢高鑒惠濟黔首蕩平之期何憂不一陛下信向三寶  
恩旨殊隆貧道味靜深山豈臨此位且領民戶興造靈  
刹所崇像福冥報有所歸僧朗頓首頓首

與朗法師書

秦主姚興

皇帝敬問太山朗和尚勤神履道飛聲映世休聞遠振  
常無已已朕京西夏思濟大猷今關未平事唯左右已

命元戎剋寧伊洛冀因斯會東封廵省憑靈伏威須見  
指授今遣使者送金浮圖三級經一部寶臺一區庶望  
玄鑒照朕意焉

與林法師書

晉王洽

洽稽首和南夫教之所由必暢物之所未悟物之所以  
通亦得之於師資雖玄宗冲緬妙旨幽深然所以會之  
者固亦簡而易矣是以致雖遠必假近言以明之理雖  
昧必借朗喻以徵之故夫殆墜之旨可得之於千載將

絕之趣可悟之於一朝今本無之談旨略例坦然每經  
明之可謂衆矣然造精之言誠難為允理詣其極通之  
未易豈可以通之不易因廣異同之說遂令空有之談  
紛然大殊後學遲疑莫知所擬今道行指歸通叙色空  
甚有清致然未詳經文為有明旨耶或得之於象外觸  
類而長之乎今衆經甚多或取譬不遠豈無一言昭然  
易喻古人有云聖人之言可能使人信之不可能是以  
徵之於文未知所釋今故諮其數事思聞嘉誨以啟其

疑洽稽首和南

南齊皇太子禮佛願疏

梁沈約

維年月朔日皇太子某稽首和南十方諸佛一切賢聖  
夫至理可祈必憑誠於正覺極妙有感乃歸仰於真如  
然後取證現前獲驗茲日去歲皇帝暫虧御膳小廢乾  
行四海震惶百司戰悚諱歷劫多幸夙世善緣忝生王  
家叨守儲嗣臣子心地倍用焦迫禁門旦啟欣問豎之  
安寢靡早闢訪膳夫之宰祗樹獨園伏膺下拜伽藍精

舍繞足頂禮百神警衛萬福具臻曾不信宿聖躬和愈  
豈非三寶之弘慈十號之法力既而天從心欲誠願克  
果今於崇正殿奉還法會千僧仍留百僧八關行道又  
度二士同日出家惟願藉此功德奉資皇帝陛下壽與  
南山共久年將北極俱長道懋農軒德高堯舜上界八  
萬之劫可期下方七百之祚未擬元良之位長守膝下  
之權上嗣之所永保懷袖之愛以茲法田奉中宮皇后  
殿下福履攸善無思不屆天母之德厚載不能加任姒



之盛坤儀寧足匹末及諸王妃主宮掖嬪房未來因緣  
過去眷屬並同茲辰預此慈善又曾為積苦餓鬼受罪  
畜生三途八難六道十惡水陸蠢動山藪翺飛濕生化  
生有想無想皆藉今日慈悲咸造浣濯人天攝受幽顯  
證明庶憑衆力共相津濟謹疏

捨身願疏

優婆塞沈君敬白十方三世諸佛本師釋迦如來安養

阿彌陀世尊

云

云一切衆聖今日道俗諸大賢德夫形

非定質衆緣所聚四微不同風火亦異析而離之本非  
一物燕肝越胆未足為譬靜念求我無時可得而積此  
淪昏生生不已一念儻值曾未移時障習相蕩旋迷厥  
路橫指空呼名之為有豐已傷物日夜靡休蓄身外之  
財以充其慾攘非已之分用成其侈豈直溫肌啗腹若  
此而已哉至於積篋盈藏未嘗登體溢俎充庖既飫斯  
棄曾不知粟帛所從事非因已悠悠黔首同有其分離  
多共寡猶或未均我若有餘物何由足仁者之懷不應

若此侵他之財世稱為盜盜之甚者孰過於斯幽顯推  
求無一或可君仰藉時來久乘休運玉粒晨炊華燭夜  
炳自此迄今歷年三十遂乃服冕榮國裂土承家潤盈  
身已慶流僕妾室非懸罄俸有兼金救寒止於重裘而  
笥委餘襲冬夜既蒙累蠶而櫝有贏衾自斯已上侈長  
非一雖等彼豪家其陋已甚方諸宴室所邁寔多悟此  
非常事由諸佛有懷捨散宜光道場飢寒困苦為患乃  
切布滿州縣難悉經緣其當稱力因事一旦隨年頭目

髓腦誠難輕慕虧已贍物未易頓行誓欲廣念深恩積  
微成著施路檀門冀或能踐以大梁天監之八年年次  
玄枵日殷鳥度夾鍾紀月十八在於新所創蔣陵皇宅  
請佛及僧髻髻祇樹息心上士凡一百人雖果謝菴園  
飢非香國而野粒山蔬可同屬餐兼捨身資服用百有  
一十七種微自損撤以奉現前衆僧夫室家患苦刀俎  
非切制除蕭散形質超然蠢彼羣生咸有佛性不因翦  
削此路莫由緣業外互世諦煩記變形改飾即事為難

故關以八支導彼清信一日一夜同佛出家本宏外教  
事非僧法而世情乖舛同迷斯路招屈名僧寘之虛室  
主人高臥取逸聞堂呼為八關去之實遠雖有供施之  
緣而非斷漏之業約今謹自即朝至於明旦排遺俗累  
一同善來分留上德勗成微志藉此輕因庶證來果功  
德之言非所敢及

南齊南郡王捨身疏

弟子蕭王上白諸佛世尊道德僧衆夫色固無象觸必

歸空三世若假八微終散雖復迴天震地之威窮於寂滅齊冠楚組之麗靡救埃壤而嗜慾易繁每疚心術捨施難宏用迷假照弟子樹因曠劫嚮報茲生託景中璇聯華日彩玉組夙紆蕃麾早建蘭池紫燕之乘擾於外間黼帳翠帷之飾光於中寢徒以心源尚滯情路未昭識謝兼忘理慚獨悟不能叶調五氣綏御六神霜暑或褰風露時舛是以敷襟上寶栖誠妙覺敬捨肌膚之外凡百一十八種當令經衛夙理府給時順萬祉雲翔百

妖窮滌望北極而有恒瞻南山而同永又願宸居納祐  
則天均慶少陽介福儷日承休儲妃闈膺祥之符皇枝  
廣惟祺之祚敬飾崇薨嚴置寶幄仰延息心旁旅清信  
勛茲宏誓證其幽疑庶可以感降禎和招對靈應玄塗  
匪昧要之無爽

千僧會願文

弟子沈約上白十方諸佛十方諸大聖今日見前衆僧  
三界非有五陰皆無四倒十纏共相和合一切如電揮

萬劫於俄頃丘井易淪終漂沈於苦岸迷途遠弱喪忘  
歸區區七尺莫知其假耳目之外謂為空談靡依靡歸  
不信不受生靈一謝再得無期約所以撫心自惻臨踐  
非譬者也至聖凝寂無迹可尋緣應所感事惟拯物持  
鉢安行出彼祇樹不逾停午以福衆生芳塵餘法哉然  
未改約以往夏邁罹痼疾帝上哀矜深垂愍慮以月次  
徂暑日在丙寅仰會千僧於其私宅隆茲重施弗知所  
限既已奉祇洪德又思自罄家財一舉盈千力難私辦



稍而後滿事或易充草堂約法師於所住山寺為營八  
集其一仰憑上定林寺祐法主今月二十九日第十會  
集百僧於所創田廬福不唐捐聞之經訓心路皎然又  
過於此凡有涓毫應證來業無巨無細咸歸聖主仰願  
十方共明此誓豈足少酬天眷蓋以微寄誠心云爾

四月八日度人出家願文

梁簡文帝

弟子蕭綱以今日建齋設會功德因緣歸依十方盡虛  
空界一切諸佛歸依十方盡虛空界一切尊法歸依十

方盡虛空界一切聖僧竊聞涅槃經言身如畫水隨畫  
隨合是身不淨九孔常流凡夫愚人常行味著愚癡羅  
刹止住其中又如瑞應經言沙門之為道也捨家妻子  
捐棄愛欲斷絕六情守戒無為其清淨得一心者則萬  
邪滅矣一心之道謂之羅漢聲色不能染榮位不能屈  
難動如地以免憂苦故知出恩愛獄薄俗為難善來比  
丘其福深重弟子以此因緣今日度人出家願一切六  
道四生常離愛欲永拔無明根削遣闇惑心修習般若

慧足踐輕輪之光口說懸珠之辯被忍辱鎧秉智慧刀  
乘菩薩車坐如來座結纏披解頂相光明戒因清白後  
報尊重所有果業皆悉勝出受持法藏為佛真子一切  
道行皆悉能行一切大誓不休不息仰願十方盡虛空  
界一切諸佛仰願十方盡虛空界一切尊法仰願十方  
盡虛空界一切聖僧咸加證明又仰願十方盡虛空界  
一切諸天仰願十方淨虛空界一切諸仙仰願十方盡  
虛空界一切聰明正直守護一切善神又願今日見前

幽顯大衆咸加證明今日誓願使弟子蕭綱得如所願  
滿菩提願一切衆生皆悉隨從得如所願

八關齋制序

夫五宅易昏四流不泊業動心風情漂愛蝕自非識達  
真空照靈珠於難曉神緣妙境蓄慈根於未化無以却  
此四魔登茲十善今列筵肅靜高宇閒邃香吐六銖煙  
浮五色目對金容耳餐玉韻無容使情緣異染形不肅  
恭類倚於鴛宮同力於羊角宜制此心蛇祛斯醉象立

制如左咸勉聽思謹條八關齋制如左睡眠籌至不覺  
罰禮二十拜擎香鑪聽經三契一出不請刺罰禮十拜  
二出過三契經不還罰禮十拜三鄰座睡眠維那至而  
不語者罰禮十拜四隣座睡眠私相容隱不語維那者  
罰禮十拜五維那不勤聽察有犯制者不即糾舉為衆  
座所發覺者維那罰禮二十拜擎香鑪聽經三契六白  
黑維那更相糾察若有阿隱罰禮二十拜七聽經契終  
有不唱讚者罰禮十拜八請刺無次第罰禮十拜九請

刺白黑刺有誤者罰禮十拜十

為人作造寺疏

郢州某甲敬白竊以布金須達表精舍於給園影石仙人造伽藍於離越莫不事表區中心憑真外但四纏惑惱去善源而無滌五濁重疊非慧刃而安揮故以愍彼濕薪傷茲滴器今於郢州某山為十方僧建立招提寺縈負郊原面帶城雉枕倚巖壑吐納煙雲重門洞啟未創飛行之殿步擱中雷猶寡密石之功嚴飾之理難階

瓶鉢之資已罄道俗儻能微留善念薄獎勝緣則事等  
觀香義同錫乘昔人修檀手雨七寶前賢薄施掌出雙  
金福有冥移言無多遜謹疏

謝勅賚納袈裟啟

三首

臣綱啟殿師吳苗奉宣勅旨垂賚鬱泥細納袈裟一緣  
分同妙葉界寫長塍拂石慚華裁金非重是日新染厥  
惟田服方便幽貞芳杜恥緝芙蓉仙客排雲羞裳飛羽  
穢食凡軀無明暗識叨恩每重荷澤難勝不任銘戴之

至謹奉啟事謝謹啟

又

臣網啟蒙賚鬱泥納袈裟一緣荀鍼秦縷因製緝而成  
文魯縞齊紈藉馨漿而受彩初開篋笥便覩含衛田疇  
不出戶庭坐視南山塋陌竊以三銖輕軟稱美服於淨  
居千金巨麗得受用於迦葉而湛恩特被萃此愚躬霜  
降授衣曲澤便及喜溢心崖如從空中所墜忽不自知  
更謂寶支所出采襖四色事非離世鉤蘭兩葉殊澤實



隆不任荷戴之至謹啟事謝聞謹啟

又

臣綱啟宣傳左右俞景茂奉宣勅旨垂賚鬱泥真納九  
條袈裟一緣精同織縷巧均結毳邁彼良疇成斯妙服  
雖復貴比千金輕踰二兩無以匹此洪恩方斯殊賚臣  
臥疾累旬未堪行踐不獲即被新染陪侍寶坊塵緣穢  
體愧荷相集不任慚悚之至謹啟事謝聞謹啟

為諸寺檀越願疏

菩薩戒弟子蕭網歸依十方盡虛空界一切諸佛歸依  
十方盡虛空界一切尊法歸依十方盡虛空界一切聖  
僧積習長夜輪轉覆灰末劫易危煩流難拯不樹兩門  
豈修二翼常恐虛蕉染惑永結駛河愛藤懸網長垂苦  
岸敢承三寶覺悟之力於幽顯前發宏誓願今願為武  
當山太平寺并此鎮望楚白塔同安習善延明頭陀上  
鳳林下鳳林廣嚴等寺皆盡形壽永為檀越雖七寶四  
事多謝往賢一念片言庶符般若方類不滅之燈終非

起煙之蜜以此功德仰福皇帝春宮家國內外咸同此  
善乃至天龍八部六道四生普皆蒙福

設無礙福會教

梁蕭綸

僚紀大士廣濟義非為已導引羣生種種方便所以虛  
已樂靜表之內經確乎難拔著自外典又加獨往斯意  
足論隱不隔真乃為菩薩廬山東林寺禪房智表法師  
德稱僧傑實號人龍懷道守素多歷年所不為事屈不  
為時伸上下無常一相無相遂能捨彼耆闍來遊垢濁

興言一面定交杵臼余以薄德謬臨大邦教義未聞貴  
賢總至昔綺季之出漢年樊許之興唐日茲廼聖主流  
慈天澤湧被異人間出復在此辰不勝舞蹈帝之恩普  
也剋今月十日於栖賢寺設無礙會并致敬開士躬諮  
勝福下筵餐道凡厥民隸爰及庶士罔不率從咸皆請  
業上答乾慈永同彼岸外依事宣行

答湘東王書

梁簡文帝

暮春美景風雲韶麗蘭葉堪把沂川可浴弟召南寡訟

時綴甘棠之陰冀州為政暫止褰櫳之務唐景薦大言  
之賦安太述連環之辯盡遊玩之美致足樂耶吾春初  
臥疾極成委弊雖西山白鹿懼不能瘡子豫赤丸尚憂  
未振高臥六安每思扁鵲之問靜然四屋念絕修都之  
香豈望文殊之來獨思吳容之辯屬以皇上慈被率土  
甘露聿宣鳴銀鼓于寶坊轉金輪于香地法雷驚夢慧  
日暉朝道俗輻湊遠邇畢集聽衆白黑日可兩三萬獨  
以疾障致隔聞道豈止楊僕有關外之傷周南起留滯

之恨第十三日始侍法筵所以君長近還未堪執筆敬  
祖前邁裁欲勝衣每自念此愍然失慮江之永矣寤寐  
相思每得弟書輕痼遣疾尋別有信此無所伸

與琰法師書

二首

五翳消空韶光表節百華異色結綵成春道體何如恒  
清宜也對玩清虛既在風雲之表遊心入理差多定慧  
之樂弟子俗務紛紜勞倦特深睠然北嶺欽賢已積會  
遇之期庶必可俛有緣之儔事等飢渴佇望來儀一日

三歲想思宏利益理當無爽指遣此信無述寸衿綱和  
南

又

旦來雨氣殊有初寒攝衛已久轉得其力雖他方法界  
略息化緣祇洹之裏恒有語對眷佇之深無時不積久  
因倩師頻述方寸不知巧笑之僧頗為津及不耳前昨  
已來微事義聚龍象畢同應供皆集慧炬開心甘露入  
頂聞之善謔特盡歡怡想味之懷轉復無極昔幼年經

聞制旨受道日淺北面未深雖異禪那事同花水今改  
西下特蓄本心訪理質疑屬在明德不謂般若留難現  
疾未瘳問津無地歎恨何已伏承輿駕尋幸伽藍冀於  
此時得一觀止辯論青豆之房遣惑赤花之舍追往年  
之宿眷述即日之寸心此事必期冀非爽指遣茲承問  
佇有還書白和南

與劉智藏書

梁元帝

菩薩蕭法車置郵大士劉智藏侍者自林宗遄反玄度



言歸以結元禮之心彌益真長之歎故以臨風望美對  
月懷賢有勞寤寐無忘興寢方今玄冥在節歲聿云邁  
日似青緹雲浮紅蘂清臺炭重北宮井溢想禪說為娛  
稍符九次成誦之功轉探三密山間芳杜自有松竹之  
娛巖穴鳴琴非無薜蘿之致修德之暇差足樂也昔韓  
梅兩福求羊二仲鄭林騰名於馮翊周黨傳芳於太原  
或有百鎰可捐千金非貴松子為餐蒲根是服未有高  
蹈真如歸宗法海梵王四鶴集林籟而相鳴帝釋千馬

經丘園而跼步有一於此猶或稱奇兼而總之何其盛也故知南臨之水已類呂梁之川北眺之山彌同武安之嶺豈復還思淑浦尚想彊臺睽彼漢池載懷荒谷以此相求心可知矣僕久厭塵邦本懷人外加以服膺常住諷味了因彌用思齊每增求友常欲登却月之嶺陰偃蓋之松挹琬玉之源解蓮華之劍藩維有限脫屣無由每坐向詡之牀恒思管寧之榻夢匡山而太息想桓亭而延佇白雲間之蒼江不極未因抵掌我勞如何想

無金玉數在郵示弱水難航猶致書於青鳥流川弗遠  
佇芳音於赤玉鶴望還信以代萱蘇得志忘言此寧多  
述法車叩頭叩頭

與約法師書

梁沈約

周中書風趣高奇志託夷遠真情素韻水桂齊質自接  
彩同栖年逾一紀朝夕聯事靡日暫違每受沐言休道  
遙寡務何嘗不北茨遊覽南居宴宿春朝聽鳥秋夜臨  
風匪設空言皆為實事音容滿目言笑在耳宿草既陳

楸檟將合眷往懷人情不勝慟此生篤信精深甘此藿  
食至於歲時包篚每見請求凡厥菜品必令以薦弟子  
輒靳而後與用為歡謔其事未遠其人已謝昔之諧調  
條成悲緒去冬今歲人鬼見分石耳紫菜愴焉興想淚  
下不禁指遣恭送以充蔬僧一飯法師與周情期契濶  
非止恒交覽物存舊彌當楚切痛矣如何往矣奈何弟  
子沈約和南

與印闍梨書

劉之遴

大喜稽首和南大喜精誠無感奄丁禍罰攀號永往五  
內屠鱠自咎自悼萬沒何補慈母臨終正念不亂繫想  
諸佛及本師至平壽盡凡夫戀著母子恩深嬰此長別  
肝心破潰不能自任遺旨以三十兩上金奉別充道場  
功德九月二十八日奉營安厝終始永畢不可復希長  
號懊惱無心苟存伏度聞問理垂哀愍所希運心救拔  
必使亡靈遊於淨土不圖此啟臨紙崩絕大喜和南

與雲僧正書

梁王筠

弟子孤子筠頓首稽首和南弟子釁結幽明備嬰荼蓼  
攀援崩踊飢髓糜潰尋繹煩冤肝腸寸斷號天叩地永  
隔精誠捨命捐軀終無補益思欲仰福廣為法事以伸  
罔極之痛少寄追慕之誠鑄像度僧仰遵法教建齋設  
會務依經典敷說大乘誘度羣生其福不淺仰惟大正  
法師道心純淑至德凝深智包空有照通真俗多聞不  
窮機辯無礙一代師匠四海推崇弟子宿植善因早蒙  
親眷情同骨肉義等金蘭外書所謂冥契神交內典則

為善友知識敬藉微緣敢陳大願來歲夏中欲仰請講  
說宏法之情既無彼此眷愛之深特希降屈公私道俗  
要請既多故預諮聞必願允遂豈圖一旦忽有斯白臨  
紙崩軋厝言無次弟子孤子王筠頓首頓首稽首和南  
與長沙王別書

筠頓首頓首高秋淒爽體中何如願比勝納承入東禮  
拜用深傾仰昔藩后遨遊不無是事或龍舟水嬉或臨  
川送遠擬金飛旆汎此安流猶復見重良書以為盛德

未有選日簡辰歸誠繫念尋法城之遊逗祗園之聚翹  
心讚歎無以譬說僕風疾增瘵蹇廢蓬門不獲執離彌  
深傾懃願敬勛白書不次王筠頓首頓首

答雲法師書

梁劉孝綽

孝綽和南辱誨垂示勅旨所答劉太僕思効啟義窮深  
遠語兼巧便伏聞希有身心踴躍昔戈盾夾車備不虞  
於周后兵旗引駕防未然於漢君斯皆執心黃屋瑞無  
紺馬事極寰寓之中理隔天人之外皇上自茲善覺降



迹閻浮以住地之心行則天之化故能慈導三有仁濟  
萬物猶以法藥未周寶船不倦解劔却蓋躬詣道場瑞  
花承足人觀雕輦之盛金輪啟路物覩重英之飾顯實  
開權事均祇驚本無四畏寧慮五怨思効遂膚引梁丘  
隨劔之說日碑觸瑟之辭何異迴龍象於兔徑注江海  
於牛跡聖旨慇懃曲相誘喻豈直淨一人之垢衣將以破  
羣生之暗室弟子世傳正見幼覩真言但惑網所縈塵  
勞自結微因宿植仰逢法教親陪寶座預餐香鉢復得

俱聽一音共聞八解庶因小葉受潤大雲猥蒙開示深  
自慶幸不勝歡喜略附陳誠劉孝綽和南

遼陽山寺願文

北齊盧思道

齊興二十有三載區宇乂安列聖重光百神受職天平  
地成禮諧樂暢劒戟亡鑄江海無波皇上體膺上哲運  
鍾下武以至德字黔首大明臨赤縣深仁俯漏惠化潛  
通榮鏡六幽照蘇八表唐旌已立芻輿不返而至殷網  
既開宵翹咸遂其所壇凝休氣渚幕榮光玄扈告符闕

翠

闕

啟籙阿閣朝誼棘林夜靜西琯協律南屯迎神衣

氣操龜之俗懷音請吏反踵修股之渠膜拜空首四海  
懾然中外提福慰候無警書軌大同猶以為負宸垂旒  
人世微業功成治定域中小道投心覺海束意玄門手  
執明珠頂受甘露調御天人不徇巖廊之重明行具足  
寧屑裘冕之尊十力四心東漸西被日月出矣風雨潤  
之屠門鮑肆化城嚴淨之所蜉蝣蟪蛄網於仁壽之域  
參墟奧壤王迹所基密都是宅別館攸在襟帶遐長原

陸爽秀高巖鬱起作鎮東偏峯羅羣玉鷺頭之狀非美  
樹列三株雞足之形可陋洞穴條風生和雅之曲圓珠  
積水流清妙之音于時玉燭調年金商在律職方具禮  
効駕西巡六龍齊轡七萃按部雷動雲移凝鑾佇蹕乃  
建仁祠于彼勝地成之不日既麗且康昔周夜初明漢  
池云鑿事隔荒裔道若存亡哲王馭歷普濟區有前聖  
後聖旦暮為期以此勝因仰為武成皇帝及清廟聖靈  
願西遇彌陀上征兜率雄視三界高臨四衢百年之神

俯輕羣后一音所導遠同佛日皇太后福踰姜水祉邁  
塗山壽比太陰業均厚載聖主齊明兩曜合德二儀受  
錄錯於靈河開金簡於仙嶽龍宮鳥紀未可匹其光大  
象天任地焉能喻其長久皇太子德茂元良道高上嗣  
牢籠啟誦孕育莊丕六宮眷屬諸王昆弟皆智慧莊嚴  
玉華松茂永侍披香長固磐石以茲博利被於萬品當  
使法界虛空生靈動植俱沐定水同蔭法雲斯誓或差  
無取正覺

北齊武成帝以三臺宮為大興聖寺詔

北齊魏收

門下皇居帝邑揆日瞻星仍雉有常几席斯在雖今古  
推移文質代變而成世作範義貴適時朕奄家四海作  
享萬國當陽負宸深存庇眚濟下利物無忘懷抱昭仁  
訓俗不遺造次今臨嚮聽朝咸極崇廣宴息之所不足  
溫華每謂為之者勞居之者逸至於離宮別館有時遊  
幸耳目所及聊可忘懷而乃千門洞啟萬柱周架上迫

雲漢下臨雷雨巧極金銅麗彈珠璧眷然長想良非宿  
心三臺並列蕪穢自久天保之末經構甫興仍創棟宇  
規摹弘博有司過實匠人逞功氓庶勞止糜費難量既  
非殿寢正所便為虛衛之地凝華生白經歷歲年不翦  
茅茨事頗逼下卑其宮室有可庶幾顧茲侈麗豈伊寧  
處自魏朝失政九域崩離人神無主實求明聖我太祖  
獻武皇帝握茲乾紀執斯地綱懸持日月嘯吒風雲紀  
忠貞以成務感靈徵而大造爰以克定之初躬圖道場

之業神迹冥果理燭幽明朕嗣膺寶祚永惟家祉仰祇  
先志尚竦玄門忍展聿修之重念歸喜捨之大肌膚匪  
恠國城何寶期濟率土至於圓極可以三臺宮為大興  
聖寺此處極土木之壯窮丹素之妍竒怪備於刻削光  
華畢於圖彩顧使靈心盼嚮神物奔會真覺唯寂有感  
必通化為淨土廣延德衆心若瑠璃法輪常轉灑甘露  
於大千照慈燈於曠劫

修起寺詔

後周明帝



制詔孝感通神瞻天罔極莫不布金而構祇洹流銀而  
成寶殿方知鹿苑可期鶴林無遠敢緣雅頌仰藉莊嚴  
欲使功侔天地興歌不日可令太師晉國公總監大陟  
屺二寺營造

隋文帝為太祖武元皇帝行幸四處立寺建碑詔  
隋李德林

門下風樹弗靜隙影如流空切欲報之心徒有終身之  
慕伏惟太祖武元皇帝窮神盡性感穹昊之靈膺錄合

圖開炎德之紀魏氏將謝躬事經綸周室勃興同心匡贊間關二代造我帝基猶夏禹之事唐虞晉宣之輔漢魏往者梁氏將滅親尋構禍蕭督稱兵擁衆據有襄陽將入魏朝狐疑未決先帝出師樊鄧飲馬漢濱彼感威懷連城頓顙隋郡安陸未即從風敵人騁輔車之援重城固金湯之守乃復練卒簡徒一舉而剋始於是日遂啟漢東蕭繹往在江陵後梁稱制外通表奏陰有異圖心迹之間未盡臣節王師薄伐帝旅推鋒誅厥方命繼

其絕祀有齊未亡凶徒孔熾連山巨防艱危萬重晉水  
之陽是其心腹於是鳴鑾執鉞假道北隣皮服欽風煙  
隨霧集懸兵萬里直指參墟左縈右拂麻積草靡雖事  
永既功而英威大振齊人因以挫衄周武賴以成功尚  
想王業之勤遠惟風化之始率夷狄而制東夏用偏師  
而取南國豈徒湯征葛伯周伐崇侯而已哉積德累功  
福流後嗣俾朕虛薄君臨區有追仰神猷事冥真寂降  
生下土權變不常用輪王之兵伸至人之意百戰百勝

為行十善故以干戈之器已類香華玄黃之野久同淨  
國思欲崇樹寶刹經始伽藍增長福因微副幽旨昔夏  
因導水尚且銘山周曰巡遊有聞勒石帝王紀事由來  
尚矣其襄陽隋州江陵晉陽並宜立寺一所建碑頌德  
庶使莊嚴寶坊比虛空而不壞導揚茂實同天地而長  
久

於相州戰場立寺詔

隋高祖

門下昔歲周道既衰羣凶鼎沸鄴城之地寔為禍始或

驅逼良善或同惡相濟四海之內過半豺狼兆庶之廣  
咸憂吞噬朕出車練卒蕩滌妖醜誠有倒戈不無困戰  
將士奮發肆其威武如火燎毛殆無遺燼于時朕在廊  
廟任當朝宰德慚動物民陷網羅空切罪已之誠唯增  
見辜之泣然兵者凶器戰實危機節義之徒輕生忘死  
干戈之下又聞殂落興言震悼日久逾深永念羣生蹈  
兵力之害有懷至道興度脫之業物我同遇觀智俱愍  
思建福田神功佑助庶望死事之臣菩提增長悖逆之

侶從闍入明並究苦空咸拔生死鯨鯢之觀化為微妙之龍臺地之野永作玻瓈之鏡無邊有性盡入法門可於相州戰地建伽藍一所立碑紀事其營構制度置僧多少寺之名目有司詳議以聞

行道度人天下敕

隋煬帝

大業三年正月二十八日菩薩戒弟子皇帝總持稽首和南十方一切諸佛十方一切尊法十方一切賢聖僧竊以妙靈不測感應之理遂通因果相資機應之徒無

爽是以初心爰發震動波旬之宮一念所臻咫尺道場  
之地雖則聚沙蓋鮮實覆簣於耆山水滴已微乃濫觴  
於法海弟子階緣宿殖嗣膺寶命臨御區宇寧濟蒼生  
而德化弗宏刑罰未止萬方有罪寔當憂責百姓不足  
用增塵累夙夜戰兢如臨淵谷是以歸心種覺必冀慈  
愍謹於率土之內建立勝緣州別請僧七日行道仍總  
度一千人出家以此功德並為一切上及有頂下至無  
間蜎飛蠕動預稟識性無始惡業今生罪垢藉此善緣

皆得清淨三塗地獄六趣怨親同至菩提一時作佛

於行陣所立七寺詔

唐太宗

門下至人虛已忘彼我於胷襟釋教慈心均異同於平等是知上聖惻隱無隔萬方大悲弘濟義猶一子有隋失道九服沸騰朕親總元戎致慈明罰誓牧登陲曾無寧歲其有桀大愚惑嬰此湯羅銜鬚義憤終於握節各徇所奉咸有可嘉日往月來逝川斯遠雖復項籍方命封樹紀於丘墳紀信捐生丹青著於圖象猶恐九泉之



下尚淪鼎鑊八難之間永纏冰炭愀然疚懷用忘興寢  
思所以樹立福田濟其營魄可於建義已來交兵之處  
為義士凶徒隕身戎陣者各建寺刹招延勝侶望法鼓  
所震變災火於青蓮清梵所聞易苦海於甘露所司宜  
量定處所并立寺名支配僧徒及修造院宇具為事條  
以聞稱朕矜愍之意

破薛舉於幽州立昭仁寺破霍光  
生於台州立普濟寺破宋金剛於

晉州立慧雲寺破劉武周於汾州立弘濟寺破王世充  
於芒山立昭覺寺破竇建德于鄭州立等慈寺破劉黑  
闥於洛州立昭福寺右七寺並官造  
又給家人車牛田莊并立碑頌德

為戰亡人設齋行道詔

門下刑期無刑皇王之令典以戰止戰列聖之通規是以湯武干戈濟時靜亂豈其不愛黔首肆行誅戮禁暴戢兵蓋不獲已朕自隋末創義志存拯溺北征東伐所向平殄然黃鉞之下金鉞之端凡所傷殪難用勝紀雖復逆命亂常自貽殞絕惻隱之心追以愴恨生靈之重能不哀矜悄然疚懷無忘興寢且釋氏之教深尚慈仁禁戒之科殺害為重承言此理彌增悔懼今宜為自征

討已來手所誅翦前後之數將近一千皆為建齋行道  
竭誠禮懺朕之所服衣物並充檀捨冀三途之難因斯  
解脫萬劫之苦藉此弘濟滅怨障之心趣菩提之道

度僧於天下詔

門下三乘結轍濟度為先八正歸依慈悲為主流智慧  
之海膏潤羣生翦煩惱之林津梁品物任真體道理叶  
至仁妙果勝因事符積善朕欽若金輪恭膺寶命至德  
之訓無遠不思大聖之規無幽不察欲使人免蓋纏家

登仁壽冥緣顯膺大庇含靈五福著於洪範三災終於  
世界比因喪亂僧徒減少華臺寶塔窺戶無人紺髮青  
蓮櫛風沐雨眷言凋毀良用憮然其天下諸州有寺之  
處宜令度人為僧尼總數以三千為限其州有大小地  
有華夷當處所度少多委有司量定務取精誠德業無  
間年之幼長其往因減省還俗及私度白首之徒若行  
業可稱通在取限必無人可取亦任其闕數若官人簡  
練不精宜錄附殿失但戒行之本唯尚無為多有僧徒

溺於流俗或假託神通妄傳妖怪或謬稱醫筮左道求財或造詣官曹囑致賄賂或鑽膚焚指駭俗驚愚並自貽伊戚動推刑網有一於此大虧聖教朕情深護持必無寬捨已令依附內律參以金科具為條制務使法門清整所在官司宜加檢察其部內有違法僧不舉發者所司錄狀聞奏庶善者必斥伽藍淨土咸知法味菩提覺路絕諸意垢

斷賣佛像敕

敕旨佛道形像事極尊嚴伎巧之家多有造鑄供養之人競來買贖品藻工拙揣量輕重買者不計因果止求賤得賣者本希利潤唯在價高罪累特深福報俱盡違犯經教並宜禁約自今已後工匠皆不得預造佛道形像賣鬻其見成之像亦不得銷除各令分送寺觀令寺觀徒衆酬其價直仍仰所在州縣官司檢校敕到後十日內使盡

與暹律師等書

唐褚亮

竊伏下風久揖高義有懷靡託於邑良深春暮清和道  
體休納弟子植生多幸早預法緣近於華嶽創立僧宇  
此山蘊蓄竒秘控接煙霞削峯累仞靈泉百丈神仙以  
為勝地賢哲之所同歸結構雖淹禪誦猶寡厥道興廢  
弘之在人且棟梁三寶必資龍象之力羽儀四衆尤待  
駕鷲之羣法師等學洞經典譽宣真俗實宜共化蒼生  
升於彼岸且遠人屈已存乎應物大德忘名唯在伸教  
理必弘濟無隔遐邇仰願俯從微請降迹來儀則釋遠

禪居遙蹤可擬王珣精舍清塵不沫是所願也是所願也

捨舊宅造興聖寺詔

唐太宗

丹陵啟聖華渚降祥叶德神居克隆鴻業朕丕承大寶  
奄宅域中遠藉郊禋之慶仰惟樞電之祉思園之禮既  
宏撫鏡之情徒切而永懷慈訓欲報無從靖言因果思  
憑冥福通義宮皇家舊宅制度宏敞以崇仁祠敬僧靈  
佑宜捨為尼寺仍以興聖為名庶神道無方微伸凱風



之思主者施行

為太穆皇后追福手疏

貞觀十六年五月御製願文致弘福寺曰聖哲之所尚者  
孝也仁人之所愛者親也朕幼荷鞠育之恩長蒙撫養  
之訓蓼莪之念何日云忘罔極之情昊天匪報昔子路  
歎千鍾之無養虞丘嗟二親之不待方寸亂矣信可悲  
夫每痛一月之中再罹難疾興言永慕哀切深衷欲報  
靡因唯憑冥助敬以絹二百疋奉慈悲大道儻至誠有

感冀銷過往之愆為善有因庶獲將來之慶

二教鐘銘

并序

周武帝

天和五年歲次攝提五月丙寅造鐘一口治昆吾之石  
鍊若溪之銅郢匠鴻鑪化茲神器雖時屬蕤賓而調諧  
夷則故春秋外傳曰所以詠歌九則平民無二宏宣兩  
教同歸一揆金石冥符天人咸契九宮九地遙徹洞玄  
三千大千遠聞邊際銀閣應供延法侶而尋聲金闕降  
真候仙冠而聽響式傳萬古廼勒銘云實際遐曠通玄

洞微化緣得業造理因機靈圖降彩慧日垂暉金河霧

集銀澗雲飛

其一

九霄仙籙五嶽真文智煙遐照禪林遠

熏金鼓入夢瓊鐘徹雲音調冬至響召秋分

其二

二教並

興雙鑾同振遠赴天霜遙虧地鎮陝河浮影漢溪傳韻

聽響弘法聞聲起信

其三

般若無底重玄有門長開久暗

永拔沉昏不求正覺莫會天尊唯全智海先度黎元

其四

大興善寺鐘銘序

未詳  
作者

皇帝道叶金輪示居黃屋覆燾萬方舟航三界欲使雲

和之樂共法鼓而同宣雅頌之聲隨梵音而俱遠乃命  
鳧氏範茲金錫響合風雷功侔造化騰驤猛虜負翼業  
而將飛宛轉盤龍繞乘風而如動希聲旦發捷槌夕震  
莫不傾耳以證無生入神而登正覺圓海有竭福祚無  
窮方石易銷願力無盡

唐西明寺鐘銘

并序未詳作者

維大唐麟德二年歲經星紀月次降婁二月癸酉朔八  
日庚辰皇太子奉為二聖於西明寺造銅鐘一口可一

萬介發漢水之奇珍採蜀山之秘寶虞倖練火晉曠飛  
鑪帶龍虞而騰規應鯨桴而寫製聲流九地遐宣厚載  
之恩韻徹三天遠播曾旻之德寤羣生於覺路警庶類  
於迷途業擅香垣功齊塵劫式旌高躅敢勒貞金其銘  
曰

青祗薦祉黃離降精渦川毓德瑤嶺飛英吹銅表性問  
寢登情興言淨業載啟香城七珍交鑄九乳圖形翔龍  
若動偃獸疑驚制陵周室規踰漢庭風飄旦響霜傳夜

鳴仰延皇祚俯導羣生聲騰億劫慶溢千齡

廣弘明集卷二十八上

欽定四庫全書

廣弘明集卷二十八下

唐 釋道宣 撰

悔罪篇第九

序

夫福曰富饒罪稱摧折富則近生四趣厚報榮祿滿於目前遠則三聖勝相資用豐於羣有至於罪也反此殊途良由沈重貪瞋能獲果登苦楚所以罪業綿亘勞歷

聖凡凡惟罪聚不足討論綸網正行事該小學致使須  
斯二果尚弊於怒癡羅漢漏盡猶遭於碎體是知無始  
故業逐分段而追徵有為積障望變易而迴首自古正  
聖開喻滋彰時張四惑乃三三九品欲使隨念翦撲豈  
得縱以燎原然以煩惱增繁難為禁制勃起忽忘早樹  
根基過結已成追悔無已但以諸佛大慈善權方便啟  
疎往咎導引精靈因立悔罪之儀布以自新之道既往  
難復覆水之喻可知來過易收捕浣之方須列遂有普



賢藥王之侶分衢而廣斯塵道安慧遠之傳命駕而行  
茲術至於侯王宰相咸仰宗科清信士女無虧誠約昔  
南齊司徒竟陵王制菩薩法淨行儀其類備詳如別所  
顯今以紙墨易繁畧列數四開明悔過之宗轄焉

謝敕為建涅槃懺啟

梁簡文帝

臣網啟伏聞敕旨垂為臣於同泰寺瑞應殿建涅槃懺  
臣障雜多災身穢饒疾鍼艾湯液每黷天覽重蒙曲慈  
降斯大福冀慧雨微垂即滅身火梵風纔起私得清涼

無事非恩伏枕何答不任下情謹奉啟謝聞謹啟

六根懺文

今日此衆誠心懺悔六根障業眼識無明易傾朱紫一  
隨浮染則千紀莫歸雖復天肉異根法慧殊美故因見  
前境隨事起惡今願捨此肉眸俱瞬佛眼如抉目王見  
淨名方丈之室多寶踊塔之瑞牟尼驚嶽之光彌勒龍  
華之始常遊淨土永步天宮耳根闇鈍多種衆惡悅染  
絲歌聞勝法善音昏然欲睡聽鄭衛淫靡聳身側耳知

勝善之事樂之者希淫靡之聲欣之者衆願捨此穢耳  
得彼天聰聞開塔關鑰之聲彈指磬咳之響諸佛所說  
悉皆總持香風淨土之聲寶樹鏗鏘之響於一念中悅  
然入悟鼻根過患彌復頑嚚耽染六蘭流連百和鬱金  
易著簷蔔難排雖復一薰一蕕叶性難遣空中海上彌  
不自覺至如彫鑪在彼翠霧飛煙識染相牽彌生纖累  
所以螂蛆甘帶自謂馨香烏鴟嗜鼠不疑穢惡今願捨  
此鼻根得彼天受振裳躡步跨跨梅檀之迥林提囊拭鉢

捧香積之寶飯長離穢濁永保清升舌根障重染惡尤  
深毒刺爭興惡虵競起既貪五黃六禽之旨又甘九鼎  
八珍之味所以焚山破卵涸水枯鱗龜臙不斟有染指  
之過羊羹不及致入陣之苦雖復鵠臙鹿胃猶不稱甘  
鳳肺龍胎更云不美雖羅鼎俎未必皆嘗在彼衆生於  
命已酷或復閒朋亂友破俗傷真變紫奪朱反白為黑  
所以讒言三至曾母投杼端木一說越霸吳亡故知三  
寸之舌未易可掉駟馬既出於事難追願斷煩惑入清

淨境既同阿難乞乳之譏又等淨名寂默之致餐禪悅  
之六味服法喜之三德形恭心到永趣菩提身根頑觸  
唯貪細軟質體塵礙不重戈矛莫不愛我輕他陵人傲  
物縱此裸蟲不羈醉象六塵四倒自此而生五蓋十纏  
因斯而致所以象簞清潤遨遊於夏室重衾狐白溫煦  
於冬房結駟廣廈動靜必安鷁首翠樓去來有託所以  
三業之過出自機關四大假成豈有真我願捨此畫瓶  
得彼金色淨寶珠之法飾照瑠璃之慧體長歸五分永

等十身意識攀緣其罪山積險同夢幻譬若猴猿懸鏡  
高堂一念難靜走丸索上百慮先馳至如二十五有紛  
繞不息九十八使驚驚無已所以灰心滅智行拔於三  
乘風禪露飲道高於六度今願斷此意根祛累斯盡心  
當恬怕洞照無生一切衆罪悉滅俗門三界異途歸之  
真域懺悔已竟誠心作禮

悔高慢文

弟子蕭綱又重至心歸依三寶竊聞禮稱弗傲表洙泗

之遺文經云不慢驗踰閤之妙典故一遇恒神陵伽尚  
生餘習上賓天帝淮南猶有誤辭亦有才曰隱淪調唯  
高俗猶足坐痺晉君立前齊主況復道隆三學法兼五  
衆如過前殿似出北門而不密室致恭遺弓接足敢藉  
勝緣願起宏誓從今日始乃至菩提於諸出家悲表虔  
敬方欲削除七慢折制六根賓頭下步庶無厭咎耆達  
棄車方思景慕幽顯大衆咸為證明

懺悔文

梁沈約

弟子沈約稽首上白諸佛衆聖約自今生已前至於無始罪業參差固非詞象所筭識昧往緣莫由證舉爰始成童有心嗜慾不識慈悲莫辨罪報以為毛羣鱗品事允庖厨無對之緣非惻隱所及晨對暮爚旦月隨年嘔腹填虛非斯莫可兼曩昔蒙稚精靈靡達遨戲之間恣行天暴蠢動飛沈罔非登俎儻想逢值橫加剽撲却數追念種彙實蕃遠憶想間難或詳盡又暑月寢卧蚊蚋噴膚忿之於心應之於手歲所殲殞略盈萬計手因怒



運命因手傾為殺之道事無不足迄至於今猶未頓免  
又嘗竭水而漁躬事網罟牽驅士卒懽娛賞會若斯等  
輩衆夥非一黨隸賓遊愆昔交互或盜人園實或偷人  
芻豢弱性蒙心隨喜讚悅受分吞臧皎然不昧性愛墳  
典苟得忘廉取非其有卷將二百又綺語者衆源條繁  
廣假妄之愆雖免大過微觸細犯亦難備陳又追尋小  
年血氣方壯習累所纏事難排豁淇水上宮誠無云幾  
分桃斷袖亦足稱多此實生死牢寔未易洗拔灌志慘

舒性所同稟遷怒過嗔有時或然厲色嚴聲無日可免  
又言謔行止曾不尋研觸過斯發動淪無紀終朝紛擾  
薄暮不休來果昏頑將由此作前念甫謝後念復興尺  
波不息寸陰驟往愧悔攢心罔知云厝今於十方三世  
諸佛前見在衆僧大衆前誓心剋已追自悔責收避前  
愆洗濯今慮校身諸失歸命天尊又尋七尺所本八微  
是構析而離之莫知其主雖造業者身身隨念滅而念  
念相生離續無已往所行惡造既由心行惡之時其心

既染既染之心雖與念滅往之所染即成後緣若不本諸真諦以空滅有則染心之累不卒可磨今者興此愧悔磨昔所染所染得除即空成性其性既空庶罪無所託布髮頂禮幽顯證成此念一成相續不斷日磨歲瑩生生不休迄至道場無復退轉又彼惡加我皆由我昔加人若不滅此重緣則來惡彌邁當今斷絕永息來緣道無不在有來斯應庶達今誠要之咸達

羣臣請陳武帝懺文

陳江總

某位某甲稽首和南十方三世一切諸佛十方三世一切尊法十方三世一切賢聖見前大德僧皇帝某菩薩睿哲聰明廣淵齊聖心若虛空照窮般若發弘大誓荷負衆生神道會昌膺茲景業百王既季運屬艱難五嶽維塵六軍日動劬勞在念有切皇心既而深悟苦空極信無我寶臺華柱本非實錄賊城樓櫓苦具茲多遂坐道場靜居禪室堅固善本具足檀那石壁山河珍車象馬頭目髓腦妻子國城鑾輅龍章翠帳玉機福德所感

威惠所及莫不肅然大捨供養三尊便欲拂衣崆峒高  
步六合到林間而宴坐與釋種而同遊紫微虛宮黃屋  
曠位上靈聳動厚土怔惶弟子等身纏愛惑業構煩惱  
天生烝民樹以司牧慄慄黔首非后罔戴豈容至尊居  
萬乘而伸獨往之情應在帝王而為布衣之事且蠻夷  
猾夏寇賊奸宄燧人警職日照甘泉之火四郊多壘未  
肆樓船之威若使七聖遂迷宦然汾水之上八駿沃若  
方在瑤池之濱則天下何依羣臣莫奉宗社廟堂有廢

彛則弟子不勝狼狽之切謹捨如干錢如干物仰覲三  
寶大衆奉贖皇帝及諸王所捨悉還本位伏願十方三  
寶見前大德僧以慈悲力用無礙心坐道放光顯揚宣  
說歡喜和合超然降許當使皇帝望雲望日之姿與南  
山等固乃神乃聖之德與北極同尊中宮后妃之星金  
禎玉幹之威窮積善之慶盡萬歲之懽玉鑒迴鑑金門  
洞啟百辟翹首措紳並列願塵勞與雲沴俱銷億兆與  
天地同泰慊慊丹愚敢以死請弟子某和南

摩訶般若懺文

梁武帝

菩薩戒弟子皇帝稽首和南十方諸佛及無量尊法一切賢聖觀夫常樂我淨蓋真常之妙本無常苦空乃世相之累法而苦樂殊見分別之路興真俗異名計著之情反顛倒我人之所彌見愚癡取捨有無之間轉成專附豈知妙道無相至理絕言實法唯一真如不二諸佛以慈悲之力開方便之門教之以遣蕩示之以冥滅百非俱棄四句皆亡然後無復塵勞解脫清淨但般若之

說唯有五時而智慧之旨終歸一趣莫非第一義諦悲  
是無上法門弟子頗學空無深知虛假王領四海不以  
萬乘為尊攝受兆民彌覺萬幾成累每時不顯嗟三有  
之洞然終日乾乾歎四生之俱溺常願以智慧燈照朗  
世間般若舟航濟渡凡識今謹於某處建如干僧如干  
日大品懺現前大眾至心敬禮慧命須菩提願諸衆生  
離染著相迴向法喜安住禪悅同到香城共見寶臺般  
若識諸法之無相見自性之恒空無生法忍自然俱足



稽首敬禮常住三寶

金剛般若懺文

菩薩戒弟子皇帝稽首和南十方諸佛無量尊法一切  
賢聖如來以四十年中所說般若本末次第略有五時  
大品小品枝條分散仁王天王宗源派別金剛道行隨  
義制名須眞法才以人標題雖復前說後說應現不同  
至理至言其歸一揆莫非無相妙法悲是智慧深經以  
有取之既為殊失就無求也彌見深乖義異去來道非

內外遣之又遣之不能得其真空之以空之未足明其妙真俗同棄本迹俱冥得之於心然後為法是以無言童子妙得不言之妙不說菩薩深見無說之深弟子習學空無修行智慧早窮尊道克已行法方欲以家刑國自近及遠一念之善千里斯應一心之力萬國皆歡恒沙衆生皆為法侶微塵世界悉是道場今謹於某處建如干僧如干日金剛般若懺見前大衆至心敬禮釋迦牟尼佛金剛般若禮長老須菩提願諸佛菩薩以般若

因緣同時集會哀憐萬品護念羣生引入慧流同歸佛  
海得金剛之妙寶見金牒之深經頂戴奉持終不捨離  
逮得已利盡諸有結心行自在無復塵勞稽首敬禮常  
住三寶

勝天王般若懺文

陳宣帝

菩薩戒弟子皇帝稽首十方諸佛無量尊法一切賢聖  
自鶴林滅迹驚嶺凝神瓶寫總持遺文不墜傳燈流布  
法輪踰廣方軌宏宣既昭著於西域分鑣顯說亦漸移

於東土而周朝徵應止見夜明漢帝感通不過宵夢香  
象所載虎觀寂而未聞龍宮所藏麟閣闐其無取山海  
為隔傳授蓋微華夷不同翻譯何幾天王所問止得經  
名金剛之經纔見一品歷魏晉而未備經宋齊而恒闕  
我皇帝承家建國光前絕後道格天地通被幽微大啟  
慈悲廣開智慧施造化以仁壽濟蒼生於解脫異世界  
而承風殊剎土而響應真人間出法寶傳通粵以天嘉  
六年外國王子月婆首那來遊匡嶺慧解深妙靡測聖

凡奉持勝天王般若經一部於彼翻譯表獻京師某校  
彼前名冥合符契總三乘之通教貫六度之淵海如開  
暗室以照優曇十方衆生若貧人之獲寶四部弟子等  
力士之得珠金牒寶印始茲辰而一啟智慧實法洎爾  
時而方具故知如來付囑必俟仁王般若興隆期於聖  
運弟子纂承洪緒思宏大業願此法門遍諸幽顯今謹  
於某處建如干僧如干日勝天王般若懺見前大衆至  
心敬禮本師釋迦如來禮般若波羅蜜禮勝天王願一

切衆生勤求般若，若不避寒暑，如薩陀波菴，不愛身命，如精進力菩薩，得般若之性，相與般若而相應，攝諸萬有，住安穩地，含靈有識，悉獲歸依，稽首敬禮，常住三寶。

妙法蓮華經懺文

陳文帝

菩薩戒弟子皇帝稽首和南十方諸佛無量尊法一切賢聖，竊以前佛後佛種種因緣，已說當說各各方便，莫非真語，悉為妙法，理無二極，起必同歸，但因業因心，稟萬類之識，隨見隨著，異羣生之相，品位分淺深，覺悟有

遲速法雨一味得之者參差法雷一音聞之者差別是  
以小乘頓教由此各名聲聞菩薩因斯分路至如鹿苑  
初說羊車小乘灰斷涅槃分段解脫以諸佛之善巧會  
衆庶之根機是曰半字未稱三點及夫會三歸一反本  
還源說大乘經名無量義滅化城於中路駕寶車於四  
衢衣裏明珠隱而還見髻中真實於焉始得出寶塔於  
虛空踊菩薩於大地見希有事證微妙法最勝最尊難  
逢難值弟子以因地凡夫屬符負荷方欲憲章古昔用

拯黎元竊以羲皇結網深失大慈成湯解羅猶非妙善  
揚旌丹水異道樹而降魔執玉塗山非寶坊之大集所  
以憑心七覺繫念四勤住菩薩乘顯無三之教學如來  
行開不二之門汲引羣迷導示衆惑今謹於某處建如  
干僧如干日法華懺見前大衆至心敬禮釋迦如來多  
寶世尊禮妙法華大乘經典禮普賢菩薩妙光法師願  
多寶如來從地涌出普賢菩薩乘象空來並入道場證  
明功德擊大法鼓轉妙法輪震動世間覺悟凡品令使



盡空法界無量聲聞無邊衆生皆為菩薩總持性相同  
到無生稽首敬禮常住三寶

金光明懺文

菩薩戒弟子皇帝稽首和南十方諸佛無量尊法一切  
賢聖尋夫靈鷲山間自有常住之相白鶴林處本無變  
易之法故知真解脫者誰辨去來實智慧者非有生滅  
而顛倒迷愚不曉三點之理無明覆蔽空有八十之疑  
於是四佛世尊百千菩薩俱會信相之室顯說釋迦之

壽明稱歎之妙偈出懺悔之法音是曰經王微妙第一  
以種智為根本以功德為莊嚴能照諸天宮殿能與衆  
生快樂能銷變異惡星能除穀貴饑饉能遣怖畏能滅  
憂惱能却怨敵能愈疾病如法修行功德已甚弟子以  
茲寡昧纂承洪業常恐王領之宜不符正論御世之道  
有乖天律庶績未康黎民弗乂方願歸依三寶憑藉冥  
空護念衆生扶助國土今謹於某處建如干僧如干日  
金光明懺見前大衆至心敬禮釋迦如來四佛世尊金

光明經信相菩薩願諸菩薩久住世間諸天善神不離  
土境方便利益增廣福田映慈悲雲開智慧日作眼目  
導為依止所成就菩提之道場安住不動之境國稽首  
敬禮常住三寶

大通方廣懺文

菩薩戒弟子稽首和南十方三寶竊以諸佛剎土不可  
言說如來稱號無有限量或過去見在共取頗羅之姓  
或同時異世俱有釋迦之名或明王十億或燃燈三萬

去來三界遍滿十方聞名者離塵受持者得道其為功德難用思議釋迦如來以無礙力遊娑羅之淨道止吉祥之福地寶池化生金花自踊說大通方廣出三寶名號譬如六天總歸一乘弟子用慈悲之心修平等之業常以萬方有罪責自一人四生未安理為重任所以薰修在已日夜忘勞精進為心夜分未息菩薩行處皆願受持諸佛法門悉令如說欲使普天率土無復怖畏之塵蠕動蝸飛永得歸依之地今謹依經教於某處建如

干僧如干日行方廣懺悔讀誦百遍右遶七匝塗香末  
香盡莊嚴之相正念正觀罄精懇之心見前大衆至心  
敬禮本師釋迦如來禮方廣經中所說三寶名字願諸  
佛菩薩尋聲赴響放淨光明照諸暗濁施清涼水滅茲  
渴愛登六度舟入三昧海總萬有而會真如齊三界而  
登實法稽首敬禮常住三寶

虛空藏菩薩懺文

竊以菩薩之於衆生是大依止觀察性相隨機濟拔一

人未度不證道果往古今來行願如一而虛空藏菩薩  
最為勝上為衆中之幢王為大明之尊主具諸佛之智  
慧得如來之秘密至因夢見形隨緣示相一聞稱號水  
火不能焚溺一心稱名刀杖不能傷害壽命財產之願  
念而必諧色聲味觸之須求而皆遂身心疾惱憐愍療  
治牢獄怖畏方便解釋此蓋隨從世法安樂衆生及夫  
動神變相去香集之境放淨光明來閻浮之界入三昧  
定除煩惱熱說陀羅尼破惡業障五濁惡世一時清涼

五根本罪並皆解脫此則開世間之眼示涅槃之路弟子承如來之教稟諸佛之慈國被菩薩之功家行大士之業方願十方刹土悉有一乘十方衆生皆修十地今謹於某處建如干僧如干日虛空藏菩薩懺見前大衆至心敬禮本師釋迦文佛禮勝花敷藏如來禮陀羅尼神呪禮虛空藏菩薩願虛空藏菩薩尋聲應赴現神通力開智慧光以種種身遊諸國土度脫衆生不乖誓願稽首敬禮常住三寶

方等陀羅尼齋懺文

竊以三世諸佛以誓願因緣十方如來以智慧方便縱  
無礙之辯開無盡之門法流派別宗源無限法本分散  
枝條不極非直摩訶般若獨有八萬四千至於陀羅尼  
門亦有九十二億處處宣說種種名稱功德無量威神  
不測至如婆藪之拔地獄波旬之發菩提花聚之獲神  
通雷音之脫掩蔽莫不因斯章句承茲業力亦有四部  
弟子十方衆生聞一句而發心聽一說而悟道故知一



切諸法無非真妙弟子側身修行所學者菩提肝食風  
興所行者濟度一心之力攝取衆生一念之頃遍諸法  
相如來種智皆願總持諸佛功德悉欲流布今謹於法  
典本之經教見前大衆至心敬禮釋迦牟尼佛禮陀羅  
尼章句禮雷音比丘禮華聚菩薩願承此功德調伏衆  
生滅三毒心破十惡業四百之煩惱自然清淨八萬四  
千塵勞一時解脫得神呪之力具法印之善入陀羅尼  
門觀諸佛境界頓銷獄火永盡無餘稽首敬禮常住三

寶

藥師齋懺文

竊以諸行無常悉為累法萬有顛倒皆成苦本熱燄鏡  
像知變易之不停漂草爨茅見生滅之奔迅隨業風而  
入苦海逐報障而趣幽途去來三界未見可安之所輪  
迴五道終無暫息之期藥師如來有大誓願接引萬物  
救護衆生導諸有之百川歸法海之一味亦能施與花  
林隨從世俗使得安樂令無怖畏至如八難九橫五濁

三災水火盜賊疾疫饑饉怨家債主王法縣官憑陵之  
勢萬端虔劉之法千變悉能轉禍為福改危成安復有  
求富貴須祿位延壽命多子息生民之大欲世間之切  
要莫不隨心應念自然滿足故知諸佛方便事絕思量  
弟子司牧寡方庶績未入方憑藥師本願成就衆生今  
謹依經教於某處建如干僧如干日藥師齋懺現前大  
衆至心敬禮本師釋迦如來禮藥師如來慈悲廣覆不  
乖本願不棄世間興四等雲降六度雨滅生死火除煩

惱箭十方世界若輪燈而明朗七百鬼神尋結縷而應  
赴障逐香燃災無復有命隨幡續漸登常住遊甚深之  
法性入無等之正覺行願圓滿如藥師如來

娑羅齋懺文

尋夫眞解脫者本自不生實智慧者今亦無滅故知鶴  
林變色非變易之文鷲山常在實常住之法但世界不  
一應赴所以不窮衆生無邊方便所以無際隨念隨著  
種種法門因業因心各各示見或八十小劫端坐之相

未移方八十年無餘之機已及熙連河側晨朝之色忽  
明娑羅樹間中夜之聲便寂最後功德是曰茲辰弟子  
有緣閻浮囑當重任愍羣生之顛倒嗟庶類之愚迷常  
願造六度之舟濟之於彼岸駕一乘之御驅之於中道  
今謹於太極殿設無礙大會首僧一夕娑羅大齋願法  
雨法雲清涼三界之火慧燈慧炬照朗百年之室常住二字  
人天共聞伊字三點凡聖並悟無勞迦葉之問不待須  
跋之疑一切種智而為根本無量功德以自莊嚴意樹

開解脫之花身田含定慧之水居處吉祥之地枕藉福  
德之場與二氣而俱貞隨四時而納祐日月天子照合  
璧於大千星辰宮殿散連珠於百億慈悲輕雨與祥風  
而並飛菩提寶雲共飛煙而合彩六合四海無復塵勞  
六道四生俱蒙清淨

無礙會捨身懺文


竊觀雅誥興義皇王興在予之言禮經令典聖人揚罪  
已之說故亡身濟物仁者之恒心克已利人君子之常

德況復菩薩大士法本行處應赴三界攝受四生運無  
量之四心修平等之六度國城妻子儻俛哀荒承祖宗  
之大業扶曳喘息當天下之重任黎民弗入庶績未熙  
御朽履冰無忘兢業又以世相泡影有為露電愛河奔  
迅欲海飛騰稟識同焚含靈共溺垂璫憑玉還覺萬乘  
非尊當宁負展翻以萬機成累夕惕若厲思宏汲引昧  
旦丕顯奉為七廟聖靈奉為皇太后聖御奉為天龍鬼  
神幽冥空有三界四生五道六趣若色若想若怨若親

若非怨親遍虛空滿法界窮過去盡未來無量名識一切種類平等大捨弟子自身及乘輿法服五服鑾輅六  
寘龍章玉几玄裘金輪紺馬珠文纓絡寶飾莊嚴給用  
之所資待生平之所玩好並爾檀那咸施三寶今謹於  
前殿設無礙大會奉行所願並諸功德具列於前願俱  
菩薩冥空幽顯俱到證明開智慧日映慈悲雲樹寶幢  
於大千擊法鼓於百億震動世界覺悟羣生放三昧之  
淨光流一味之法雨引愚癡於火井拔煩惱於棘林出



輪轉河到無生岸



廣弘明集卷二十八下